

*Questa poesia è tratta dal volume "Rosas e ispinas de Baldedu", Edizioni Ivo Melis, pubblicato dallo stesso Truddaju a Cagliari nel 1992. (v. pagg.115-116)*

Fizu meu, fizu meu,

comente mi ses boladu!

Tue fis su meu fadu,



su 'acchiddu 'e sa 'ezza.

Fizu meu, ischida e pesa,

parti luego a sa tanca,

chi s'ebba murra bianca

est inseddada in s'appittu!

S'ama est isparta in su littu

isettende su pastore,

pesa, istimadu fiore,

e parti comente prima

a ue haias istima:

a sas feras, a sas 'amas!

Fizu meu, pius non m'amas,

tancad'oju has a sa vida!

Ite pena incruelida

chi mi trapassat su coro!

Tue fis briu e tesoro

de custa pobera domo!

Ahi! Colza, colza! Como

in domo rutu est s'affannu!

Fizu, como chi fis mannu,

como chi fis bonu 'onu

M'has lassadu in abbandonu,

in su piantu profundu.

Sas bellesas de su mundu

benin e partin luego...

Fizu caru, como prego

chi 'enza prestu a incue,

pro istare deo e tue

sempre a costazu 'e pare,

ca non poto domandare

a sa vida atera cosa.

Parti como e reposa

a su fiancu 'e Deu.

Fizu meu, fizu meu!